



**Uunnga:**

Inatsisartuni ilaasortaq  
Karl Lyberth, Siumut

**§ 36, imm. 1- naapertorlugu Karl Lyberth, Siumut apeqquteqaataanut 12. oktober 2009-meersumut akissut.**

linatsisartuni ilaasortaq Karl Lyberth Naalakkersuisunit akineqartussanngorlugu imatut apeqquteqaateqarpoq:


*Maannakkut Naalakkersuisuusut naalakkersuisunnngormata nunatta karsia qanoq amerlatigisunik imaqarpa, aammalu nunarput tamakkerlugu suliffissaaleqisutut allattorsimasut qanoq amerlatigippat ?*

Inatsisartuni ilaasortaq Karl Lyberth, Siumut, apeqquteqaateqarneranut qutsavigissavara.

**1.Suliffissaaleqisutut nalunaarsorneqarsimanerinit paasissutissanut tunngatillugu akissut**

Nalunaarusiami tullinnguuttumi "2008-mi illoqarfinni suliffissaaleqisut"-neersumi takuneqarsinnaapput 2008-mi ineriartorsimanerit aammalu ukiup ingerlanerani qaammatikkaartumik ineriartorsimanerit:

Figur 4. Udviklingen i antallet af berørte af ledighed i byerne i 2006-2008 fordelt på måneder



Anm.: Figuren indeholder personer mellem 15 og 62 år, født i Grønland og bosiddende i byerne.

*Paasissutissat: "2008-mi illoqarfinni suliffissaaleqisut" Naatsorsueqqissaartarfimmit saqqummersinneqartoq, aamma takujuk [www.stat.gl](http://www.stat.gl).*

*"....[nalunaarusiami siulianiittumi]erseqqissumik takunqarsinnaavoq illoqarfinni suliffissaaleqisut ukiup ingerlanerani allanngorartut. Suliffissaaleqisut ukiup allattinnerani nalinginnaasumik amerlanerpaajusarput, upernaallu ingerlanerani*

16. november 2009

Postboks 1037  
3900 Nuuk  
Oq/tel +299 34 50 00  
Fax +299 32 46 14  
oed@gh.gl  
www.nanoq.gl

*ikiliartulersarlutik aasaaneranilu ikinnerpaajusarlutik. Ukiap ingerlanerani suliffissaaleqisut amerliartoqqilersarput.”*

Nalunaarusiaq siuliani saqqummiunneqartoq tassaavoq illoqarfinni suliffissaaleqisut nalunaarsorsimaneranut tunngatillugu paasissutissat pissarsiarineqarsinnaasut nutaajunersaat.

Siuliani takuneqarsinnaasutut suliffissaaleqisut amerlassusaat ukiup qanoq ilinera apeqqutaalluni allanngorartorujussuupput, suliffissaaleqisut nalinginnaasumik juni-juli-mi ikinnerpaajusarlutik januarimiit martsimullu amerlanerpaajusarlutik.

Aningaasaqarnermut Naalackersuisoqarfiup Naatsorsueqqissaartarfik attavigisimavaa 2009-mi suliffissaaleqisut amerlassusaat pillugit paasissutissanik pissarsiniarluni. Naatsorsueqqissaartarfiullu nalunaarutigaa, kommunit kommunerujussuanngorlugit kattunneqarnerisa kingorna kommunit Naatsorsueqqissaartarfillu ikaarsaariarnermi teknikkikkut ajornartorsiuteqarsimasut, tamatumalu kingunerisaanik suliffissaaleqisut pissusissamisut nalunaarsorneqarsinnaasimanatik.

Tassunga tunngatillugu naatsorsuutigineqarpoq sapaatip akunnerini qaninnerni suliffissaaleqisut amerlassusaat pilugit paasissutissat tunniunneqarsinnaasasut.

Taamaattumik apeqqut akisinnaanngikkallarpara. Tassunga tunngatillugu Inatsisartuni ilaasortaq Karl Lyberth kaammattussavara Naatsorsueqqissaartarfimmit saqqummersinneqartartut aqutugalugit paasissutissanik pissarsiniartarsinnaanissaanik.

## **2. Nunatta Karsiata akiliisinnaassuseqarnera pillugu paasissutissat**

Tullinnguuttumi nalunaarusiami ilanngunneqartumi takuneqarsinnaapput nunatta karsiata akiliisinnaassuseqarnerata januar 2009-miit oktober 2009-mut ineriartorsimanera.

### **Nalunaarusiaq 1 nunatta karsiata piffissami sivikitsumi akiliisinnaassuseqarnera, januar – oktober 2009, 1000 kr.-inngorlugit**

<b>Qaamatip naanerani naatsorsukkat:</b>	<b>Kr.</b>
Januar 2009	2.093.913
Februar 2009	2.074.117
Marts 2009	2.063.695
April 2009	1.983.109
Maj 2009	2.094.331
Juni 2009	2.160.316
Juli 2009	1.546.049
August 2009	1.287.907
September 2009	1.261.351
Oktober 2009	1.101.773

*Paasissutissat: Qitiusumik Naatsorsueqqissaartarfik, Namminersorlutik Oqartussat.*

Nalunaarusimai siuliani saqqummersinneqartumi nunatta karsiata piffissami sivikitsumi akiliisinnaassuseqarnerata naatsorsorneqarneri saqqummersinneqarput.

Akiliisinnaasutsip 2009-mi junimit julimut annikilleriarneranut pissutaasoq annerpaaq tassaavoq Inatsisartut aalajangermassuk Royal Greenland A/S aningaasaliiffigineqaqqissasoq 250 mio. kr.-inik tamatumalu saniatigut taarsigassarsitineqassasoq aamma 250 mio. kr.-inik, taamaasilluni ingerlatseqatigiiffik katillugit 500 mio. kr.-inik aningaasaliiffigineqarpoq. Aningaasat pineqartut nunatta karsiata naatsorsuutaanit toqqaannartumik ilanngaatigineqarput, taamaasillunilu nunatta karsianut tunngatillugu IST-inerneranut 500 mio.kr.-inik ajorseriartitsilluni. Tassunga tunngatillugu ilisimatitsissutigineqarsinnaavoq 250 mio. kr.-it nunatta karsianut kingusinnerusukkut taarseqarnissaat naatsorsuutigineqarmat.

Qaammatisiutit naapertorlugit ukiup affaata kingulliup ingerlanerani nalinginnaasuuvoq aningaasaqassutsip 250-300 mio. kr.-inik appariartarnera, pisussaaffiit assigiinngitsut naammassineqartarnerisa kingunerisaannik, tassunga ilanngullugit akilerarutinit utertoortissat akilerneqarnerat, kiisalu sanaartornermut iluarsartuussinermullu aningaasaateqarfimmiit atukkat.

Inussiarnersumik inuulluaqqusillunga

Palle Christiansen